

05/06/2004

Orang Melayu semakin gagah tawan gunung salji

HANYA ucapan tahniah dan syabas yang mampu saya berikan kepada dua sahabat berhati waja, Kobin dan Reduan atas kejayaan cemerlang mereka menawan gunung salji tertinggi di dunia, Everest. Ketika kecil dulu, saya selalu membaca buku Bacaan Dewan terbitan Dewan Bahasa & Pustaka yang menceritakan mengenai percubaan pendaki yang mahu menawan Everest. Ada yang berjaya seperti Sir Edmund Hillary dan tidak kurang juga yang terkorban akibat dilanda ribut dan runtuh salji (avalanche) yang amat dahsyat.

Namun alhamdulillah, dengan kehendak Allah yang merestui usaha gigih Kobin dan Reduan itu, mereka akhirnya menjadi anak Melayu pertama serta pelajar paling muda di Asia Tenggara yang berjaya sampai ke puncak Everest.

Berat mata memandang, berat lagi bahu memikul. Saya tidak dapat membayangkan bagaimana detik-detik mereka melalui ekspedisi agung yang selama ini lebih dikuasai mereka yang tinggal di negara empat musim dan bersalji. Kobin dan Reduan adalah anak Melayu yang membesar di dalam selut dan lumpur bendang tetapi akhirnya berjaya menguasai dunia yang asing bagi kita dengan penuh cemerlang.

Saya yakin ketika ini, bekas Perdana Menteri, Tun Dr Mahathir Mohamad akan tersenyum bangga melihat pencapaian dua sahabat itu kerana beliau adalah insan yang banyak mengajar rakyat Malaysia supaya menjadi berani mencuba dan terus mencuba perkara yang dulunya nampak semacam mustahil. Idea dan semangat yang Dr Mahathir tinggalkan kepada kita itu akan sentiasa menjadi pembakar semangat.

Selain kita kejayaan negara di mata dunia itu, i-Kon minggu ini juga menampilkan perkembangan terbaru daripada dunia fesyen. Pereka tempatan terkenal yang baru kembali dari Dubai dan London, Rizalman Ibrahim, tampil bersama koleksi pakaiannya yang penuh sensasi untuk ruangan Stail. Hmm... panas....

Bagi yang masih bercuti panjang, anda boleh melancong ke pelbagai tempat menarik di Malaysia. Pelbagai pakej menarik ditawarkan ketika ini dan banyak lokasi hebat menanti tanpa perlu ke luar negara.

Pada hujung minggu ini juga, anda boleh keluar menonton filem terbaru di pawagam kerana banyak filem menarik ditayangkan seperti Shrek 2, Harry Porter dan The Day After Tomorrow. Kalau teringin menyaksikan dua bintang hebat, Datuk Rahim Razali dan Azean Irdawaty beraksi di pentas teater, jangan lupa saksikan persembahan menarik daripada DramaLab, Otak Tak Center, di Panggung Bandaraya, KL. Selamat bersantai!

(END)